

浮山志卷四

酥醪洞主輯

詩上 唐至 國朝

有僧言羅浮事因為詩以寫之

唐 劉禹錫 夢得 彭城

君言羅浮上容易見九垓漸高元氣壯洶湧來翼身夜宿
最高峯瞻望浩無鄰海黑天宇曠星辰來逼人
是時當朏魄陰物恣騰振日光吐鯨背劍影開龍鱗
條若萬馬馳旌旗聳齋淪又如廣樂奏金石含悲
辛疑其有巨靈怪物盡來賓陰陽迭用事乃俾夜
作晨咿喔天鷄鳴扶桑色昕昕赤波千萬里湧出
黃金輪下視生物息霏如隙中塵醯雞仰甕口亦謂
雲漢津世人信耳目方寸度大約安知視聽外怪愕
不可陳悠悠想大方此乃栢水濱知小天地大安
能識其真

志四

寄題羅浮軒轅先生所居

唐 皮日休 襲美 襄陽

亂峯四百三十二欲問徵君何處尋紅翠數聲瑤室響
真檀一炷石樓深山都遣負沽來酒樵客容看化後金
從此謁師知不遠求官先有葛洪心

奉和襲美寄題羅浮軒轅先生所居

唐 陸龜蒙 魯望 蘇州

鼎成仙馭入崆峒百世猶傳至道風暫應青詞為穴鳳
却思丹徼伴冥鴻金公的的生爐際瓊女時時到夢中
預恐浮山歸有日載將雲室十洲東

賦得送軒轅先生歸羅浮山

唐 李 洞 才江 京兆

舊山歸隱浪搖青綠鬢山童一帙經符帖布帆猿鳥看藥

煎金鼎鬼神聽洞深頭上聆仙語船靜鼻中間海腥此處
先生應不住吾君南望謾勞形

贈軒轅先生

唐僧貫休德隱蘭谿

曾親文景上金鑿語共容成語一般久向紅霞居不出若
非清世見應難滿鑪藥熟分仙盡幾局碁終看海乾略問
先生真甲子只言弟子是劉安

懷軒轅先生

唐僧齊己得生益陽

不得先生信空懷汗漫秋月華離鶴背日影上鰲頭欲學
孤雲去其如重骨留槎程在何處人世屢荒邱

聽軒轅先生琴

唐僧虛中宜春

訣妙與功精通宵膝上橫一堂風冷淡千古意分明坐客

志四

二

神魂凝巢禽耳目傾酷哉商紂世曾不遇先生

五色雀

宋余靖安道曲江

羅浮有五色雀各被方色非時不見若士大夫將
遊是山則先日羣翔寺僧以是為候余庚辰歲謫
官來遊將至之夕茲鳥亦集感之成咏云

五方純色儼衣冠應是山靈寄去翰多謝相逢殊俗眼謫

官猶作貴人看

白水山佛跡巖

公自註羅浮之東麓也
在惠州東北二十里

宋蘇軾子瞻眉山

何人守蓬萊夜半失左股浮山若鵬蹲忽展垂天羽根株
互連絡崖嶠爭吞吐神工自爇鞴融液相綴補至今餘隙

鑄流出千斛乳方其欲合時天匠磨月斧帝觴分餘瀝山
骨醉后土峯巒尙開闔澗谷猶呼舞海風吹未凝古佛來
布武當時汪罔氏投足不蓋拇青蓮雖不見千古落花雨
雙溪滙九折萬馬騰一鼓奔雷濺玉雪潭洞開水府潛鱗
有飢蛟掉尾取渴虎我來方醉後濯足聊戲侮回風卷飛
雹掠面過彊弩山靈莫惡劇微命安足賻此山吾欲老慎
勿厭求取谿流變春酒與我相賓主當連青竹竿下灌黃
精圃

詠湯泉

公自註在
白水山

蘇軾

積水焚大槐蓄油災武庫驚然丞相井疑浣將軍布自憐
耳目隘未測陰陽故鬱攸火山烈甯沸湯泉注豈惟渴獸
駭坐使癡兒怖安能長魚鼈僅可燔狐兔山中惟木客戶
外時芒屨雖無傾城浴幸免亡國污

志四

三

同正輔表兄游白水山

蘇軾

偉哉造物真豪縱攫土搏沙爲此弄擘開翠峽走雲雷截
破奔流作潭洞因隨化人履巨迹得與仙兄躡飛鞚曳杖
不知巖谷深穿雲但覺衣裘重坐看驚鳥救霜葉知有老
蛟蟠石甕金沙玉礫粲可數古鏡寶奩寒不動念兄獨立
與世疎絕境難到惟我共永辭角上兩蠻觸一洗胸中九
雲夢浮來山高回望失武陵路絕無人送筠籃擷翠爪甲
香素纒分碧銀餅凍歸路霏霏湯谷暗野堂活活神泉湧
解衣浴此無垢人身輕可試雲間鳳

次韻正輔同游白水山

蘇軾

祇知楚越為天涯不知肝膽非一家此身如縷自縈繞左
旋右轉隨纜車誤拋山林入朝市平地咫尺千褒斜欲從
稚川隱羅浮先與靈運開永嘉首參虞舜款韶石次謁六
祖登南華仙山一見五色羽雪樹兩摘南枝花白魚赤蟹
箸屢下黃柑綠橘邊常加糖霜不待蜀客寄荔支莫信聞
人誇恣傾白蜜收五稜細刷黃土栽三椹公自註正輔分人參歸種韶陽
來詩本用硯字惠州無書不見此字所出故且從木奉和朱明洞裏得靈草翩然放杖
凌蒼霞豈無軒車駕熟鹿亦有鼓吹號寒蛙仙人勸酒不
用勺石上自有樽巵窪徑從此路朝玉關千里莫遣臺釐
差故人日夜望我歸相迎欲到長風沙豈知乘槎天女側

志四

四

獨倚雲機看織紗世間誼似老兄弟篤愛不復相疵瑕相
攜行到水窮處庶幾一見留子嗟千年枸杞嘗夜吠無數
草棘工藏遮但令凡心一洗濯神人仙藥不我退山中歸
來萬想滅豈復回顧雙雲鴉

安期生并引

蘇軾

安期生世知其為仙者也然太史公曰蒯通善齊
人安期生嘗以策干項羽羽不能用羽欲封此
兩人兩人終不肯受亡去予每讀此未嘗不廢書
而歎嗟乎仙者非斯人而誰為之故意戰國之士
如魯連虞卿皆得道者歟

安期本策士平日交蒯通嘗干重瞳子不見隆準公應如

客爭傳竹葉符

東林寺

宋 芮 畦 國器 烏程

修竹長林羅水東
梵王家近葛仙宮
耳聞清磬是非靜
心領菩提名利空
啖棗尙知前世事
拈花還遇上機翁
抽簪若得燒丹訣
莫負扶桑半夜紅

浮碇岡

宋 傅 烈 承仲 晉江

洪水未必能流山
別島安得居人間
扶桑夜半光吐焰
銅龍白晝飛塵寰
初聞其事驚且異
傳言豈或流于蠻
試將圖牒爲考訂
山中記載皆班班
扶藜喜作山中行
勝處不復愁天慳
樓臺自是人隔絕
峯岫直與天回環
憑虛搜冥一眺望
日觀朱明兩山向
乃知雲浮山更浮
二山總在三

志四

六

山上從來凡眼不見識
怪怪奇奇千萬狀
我疑靈竇皆國寶
不待山人留心匠
丹崖佛迹直未耳
天輦名山世基仗
干戈昔日間馬嵬
有壇百尺那能開
坐中一笑失道士
國勢隨滅如煙埃
清廟祀典歲歲舉
慶基福地源源來
願將此山比南山
歌詩直紀山之隈

夜樂洞

宋 劉克莊 後村 莆陽

異境微茫在半霄
仙人垂手下相招
老來絲竹相忘久
何意韶鈞在鐵橋

遊羅浮

宋 莫洞觀 容州

嵯峨千仞控炎陬
鐵作橋梁石作樓
五嶺衆山皆拱附
三神一島自漂流
氣凌滄海遙相視
看入青雲勢未休
借問

稚川今在否待飛雙燕結真遊

寄莫道人 二首

宋 陳文孫

林木自春蘭自芽遊山過我與何賒鐵橋問徑最高頂石
洞開雲隨處家人訝長年能綠髮我知真性卽丹砂談鋒
未了歸途速一雨洗塵清可涯

暫閒吏債訪仙居雲亦隨人爲卷舒桑下忽逢二度宿腹
中如飽十年書哦詩對酒誰知我食柏餐霞一任渠底事
若能無障礙不愁無地着吾廬

寄莫道人

宋 林同叔

萬古煙霞隱石門洞中別是一乾坤仙翁自不知年歲山
下于今幾代孫

志四

七

訪莫道人不遇

宋 唐 彪

羅浮道人雙鬢青抱一息踵誦黃庭秋深何處采芝朮我
來但見松山局

白雲山見五色雀

宋 李昉英 文溪
番禺

羅浮禽五色創見此山椒錦羽嬉同墜鐵冠遷最喬疑隨
仙馭過喜趁白雲招貴客非關我勞渠千里遙

羅浮峒長寶谷王室素送藥瓢

李昉英

久矣深山煉鶴形聞呼峒長又逃名斷崖怪木人稀跡亂
石奔泉澗有聲劍定通神收古匣棋聊供玩戲紋枰藥瓢
解贈宜無意重到孤菴論養生

羅浮梁彌仙游爛柯山贈以曲筇方笠

李昂英

葛陂龍竹東坡笠合伴山人到洞天
柯爛想應留斧在憑君試問石橋仙

李昂英

勸梁彌仙歸羅浮舊隱

逍遙八極片雲浮所過名山不久留
依舊片雲歸石洞從今休更下山遊

李昂英

戲贈梁彌仙自寫照

八十童顏雙眼明浪遊湖海一身輕
莫將啖肉先生比箇是羅浮老樹精

宋 葛長庚 白叟瓊州

試劍石

神劍沈埋生紫氛年來劍俠亦無聞
一從袖裏青蛇去君

志四

八

山洞庭空水雲道人習劍得真訣
時見壇前青石裂誰能持此靖八荒
割然磔洒狐鼠血

葛長庚

桃源洞

因訪癯仙傍柳隈不堪風景把人催
松杉十丈入斤斧厦屋數間俱劫灰
道士潛心隱丹竈兒童勸我舉霞杯
誰知自有長生訣獨步白雲歸去來

宋 胡 衍 雲峯廬陵

鐵橋

是鐵不是鐵非空却似空到得方知得
何勞說異同

宋 陳夢庚

自劉真人庵上登飛雲

列仙壇上碧雞鳴布襪青鞵取次行
上界煙霞疑可到東方草木漸知名
一泓滄海杯浮景萬點青山棋下枰
脚底

雲飛寒帶雨此身知是在蓬瀛

蓬萊閣

宋 鄭康佐 慎陽

獨占林泉勝金碧耀青冥凭闌俯八極縹緲降玉京羣仙
日往還簫韶聞九成鸞鳳為君導恍然遊蓬瀛

鐵橋

鄭康佐

青蛻跨河山龍鳳互撐拄頡頏來雙鳧孰云通步武壺中
杳靄閑遐想神仙侶夢錫九霞丹翩翩遊紫府

鄜仙騎牛石

鄭康佐

橫笛騎青牛巖扉自開闢倏然乘風馭雲收煙滅迹真人
不可見空遺舊泉石我來獨徘徊日暮千山碧

鳳皇谷

宋 李夢呂 龍湖 循州

志四

九

羅浮絕頂凌蒼穹五雲飛繞蓬萊宮金烏玉兔出西東鐵
橋萬丈橫霽虹卧虎踞石龍蟠松異香不動煙騰空餐霞
飲露凡聖同水簾玉碎聲玲瓏桃花流出片片紅碧梧翠
竹環三峯天邊鳳鳥來離離仙風吹入石洞中我欲呼之
儀九重歌舞聖化同天功

明福觀

宋 王 傅 巖起 蓬萊

泉源山下延平曠路入松關起清爽飛雲西峙積翠臺突
兀三千六百丈杏花片片鋪金壇天風吹桂香漫山遊人
盡去蘿月上覺我身世非人間

題明福法堂壁

宋 雲章真人

一望羅浮聳萬山畫圖曾進悅天顏金爐飛篆汞鸞去玉

笈翻經引鶴還棋洞落花春寂寂藥槽流水夜潺潺人來
共道修仙易誰肯安心學坐圓

明福觀

元 趙孟傑 公甫 新會

翳泉源之福地歷晉宋而至今鄉鄭葛兮何處謾追躡而
空尋若有人兮山之阿碧蘿翠蔓延幽深流水以為帶列
峯以為簷松風兮響金奏竹泉兮鳴玉琴恍惚眇莽不可
見但覩萬木深鬱羅翠林夜殘忽疑鸞鳳鳴靜聽細思山
鳥吟遙想仙馭飛歟來玉岑

登上界峯

明 陳 璉 琴軒 東莞

仙山鬱嵯岬千古青未了樓臺起中天鐘磬出林杪奇香
散仙葩五色翔神鳥飄然躡高頂洞覽周八表

志四

十

誰將羅浮山分來莫南土峯巒餘四百歷歷青可數泉源
近福地靈勝開今古曾見黃真人雲中騎啞虎

聚仙壇

明 李 顯 思誠 博羅

奇峯四百碧巘岬惟有茲壇勢獨尊遠揖三神為伯仲俯
看五嶺似兒孫中天日月巖頭轉白晝風雷腳底翻不是
飛仙那可到驂鸞何日去朝元

鐵橋

明 李承箕 世卿 嘉魚

天風吹上鐵橋頭回首乾坤五百秋萬里桴浮滄海遠九
疑雲暗鳳皇愁忽看天上春臺燭長送人間夜壑舟凝睇
茫茫正愁絕此心不是學巢由

鐵橋

明 湛若水 甘泉 增城

鐵橋橋下水翻飛信步吾行行不疑童子隔溪聞對語公
今是穩是危時

登三峯步洗少汾鐵橋韻

明 王漸遠 青蘿香出

遙入三峯上界西恍然身與太虛齊千章異木名難識十
里青霞望欲迷石壁飛泉鄰舊館斷珉封蘚認留題春風
歸夢空相憶欹枕藤牀獨聽雞

鐵橋

王漸遠

狂客山中不費招瑤池春宴夜聞簫醉餘不記歸時路曾
跨青羊過鐵橋

符竹

明 黃 畿 宗大香山

真氣通瑤島靈符降玉清不隨寒暑變應使鬼神驚雨灌

志四

十一

琅玕長風翻翡翠明誰云蟲所篆葉葉是天成

夜樂洞

黃 畿

誰能雲卧上三峯一枕羲皇萬境空夜半碧雞驚夢覺鈞
天聲在日華中

了髻峯

黃 畿

綠雲雙縮似仙粧山下梅花相映香笙鶴不歸春寂寞碧
溪流水過羅陽

羅水

黃 畿

一杯羅水不容芻流往西南亦太勞直到天池千萬里鵬
搏鯤化起洪濤

羅浮酥醪觀

明 黃 佐 才伯香山

安期生飲天漿醉後一噓喻水露化作酥醪香飈驂陵羽
已飛去玄邱漠漠雲茫茫葛洪得丹砂煉向安期家河車
轉運隨日華丹成亦得觴九霞天端比翼不可見碧澗菖
蒲開紫花

郭學忠公枉過石洞得東字

明葉春及化甫歸善

抱犢鹿門中蕭蕭日暮風卧愁聞塞北立恐離牆東濁酒
開三徑高軒過數公濟時吾豈敢愚谷倘相同

趙太史黎秘書龐太守湛別駕祁孝廉過訪石洞

葉春及

傲世吾何敢高情客故來鳥迎雲蓋入花近草庭開選勝
常移席攀蘿更上臺祇虞漁父問桃近水邊栽

志四

三

李敬可劉和甫訪予石洞敬可贈詩有卜鄰之意賦

此奉答

葉春及

空山吾獨往二妙復能來雲裏峯為障天邊石作臺澗流
風不斷杯盡雨相催結屋如鄰並清溪掃綠苔

白雲洞口號

葉春及

洞晚雲隨入巖秋雨自飛莫愁霑野席猶得浣塵衣歲月
吾將老煙霞興不違昔年招隱處叢桂可同歸

寄石洞葉化甫

明羅洪先念庵吉水

君向羅浮住羅浮深若何難隨黃鵠舉空望白雲多海月
宵偏近梅風晚更和世人不到處獨醒對煙蘿

石洞訪葉化甫

明郭子直青螺浙江

石室青霞外千山只一家尊中銷日月筆底總瑤華供客
分猿果從僧引鹿車何令世人識洞口有桃花

訪石洞

明趙志皋汝邁
蘭谿

使君成靜癖解綬買山居醒眼甘違俗科頭但著書泉聲
流夜枕雲影帶春鋤杯酒相留晚煙霞意味疏

鳳凰谷

明黎民表惟敬
從化

翩翩五色鳥乘雲自丹穴覽輝千仞岡弄影寒潭潔飲啄
豈不謀腥腐非所屑虞羅爾何施清冷坐怡悅

軒轅試劍石

黎民表

仙翁本劍俠遊戲龍衮前金盤射白鵲鶴髮換童年幻化
乃能爾金石亮非堅神物終騰躍洪爐空焰煙

志四

三

單道開石室

黎民表

至人鍊其形冬夏常穴處細石伴瓊館飢來自堪煮萬形
等歸盡道遙斂神去香火遺破巖霞蹤杳何許

同趙太史請公過葉刺史石洞

黎民表

憐君專一壑猶是俸錢餘澗水鏘鳴玉雲蘿引曳裾山都
能送酒木客解窺書子亦瑤臺客過逢兩鹿車

劉仙壇

黎民表

坐出千林杪壇荒累劫餘煙霞歸內景天地入遠廬白石
留禽戲蒼筠篆鳥書無能採藥爰歸路獨踟躕

同諸子憇玉女峯瑤石臺下

黎民表

飛雲煙霧裏流水自潺潺一片瑤臺石飛來積翠間月應

臨曉鏡風爲徹玄關玉女休相笑予方鍊大還

同鄒方伯繼甫遊羅浮鐵橋

黎民表

崇壑原無跡飛空不著人煩君驅石去千古導迷津

阿耨池

明 歐大任 禎伯順德

劫火銷沉白馬鳴山中曾有化人城龍聽佛法千輪相鳥
下僧齋一磬聲入定錫飛泉已迸安禪心靜月長明閣浮
世界須甘露誰灑清泠惠衆生

題單道開石室

歐大任

衣褐南來客羅浮路不迷初行秦甸外肯止鄴城西餐石
何須煮編茅尚可棲千秋蟬蛻地謝豹爲誰啼

石洞訪葉化甫

歐大任

志四

古

谷口軒車過尋君路始經星曾窺太白雲自上空青書著
虞卿日玄留蜀客亭似聞羔幣起未許久沈冥

過石洞贈逃闇主人葉化甫

明 張 萱 孟奇博羅

白雲深處獨移家三徑蕭條兩鬢華授訣已知還九煉尋
僧又欲演三車新題徧石間生篆古木經秋亦着花老去
笑君逃未得初衣猶自染煙霞

逃闇秋夕

明 朱 完 季美南海

巖棲澹無寐宵景翳將入霜皋歸鶴語綺樹流螢涇疏鐘
戶戶動病葉梢梢急人靜參已橫偎籬夜深立

訪化甫石洞十四韻

明 曾仕鑑 人倩南海

洞爽朱明勝峯環玉女深晴窗含岫色夏木舞溪陰羽觀

鄰曾卜仙蹤杳莫尋一官輕脫屣四海重投簪往事過棋
局浮生歎陸沈鶴巢依密樹鹿性戀豐林老稱逃名隱閒
消出世心眠高忘晝永慮澹卻塵侵爾素甘雲卧吾來有
足音振衣凌鳥道洗耳聽龍吟蘚蝕雲中屐松巖石上琴
江山容偃蹇天地幾登臨鬢短書猶著歌長酒並斟昔聞
迴俗駕今見滌塵襟

紫霞洞

曾仕鑑

古洞卽仙居飛樓接太虛身疑蝶後人自祝雞餘樹杪
懸風磴蒲根溜石渠往來幽興熟何處不吾廬

試劍石

明韓鳴金伯聲
博羅

仙客攜長劍星文乍有無步光開石竅飛響駭山都龍化

志四

五

何時出虹流片影孤越金曾斂鏐持此問風胡

石洞

韓鳴金

結屋隨幽境真成一洞天寒流聽洗耳怪石坐揮絃客到
湖光淨庭空樹影懸俗緣憐未了吟望獨道然

石洞山房

明史繼偕

擘石齊通徑環山曲抱村天遺知白谷人道草玄門水響
分泉細林香帶霧渾坐看雙去鳥欲辨已黃昏

洗耳泉

明韓晁賓仲
博羅

長嘯吹高松流影亂泉水祇恐雲未深有人來洗耳

羅浮雜興錄四

明李雲龍煙客
番禺

浮山千餘仞上有珠樹林雲霞互虧蔽鸞鶴巢其陰仄聞

紫煙客羽駕紛來臨玉液有餘清雲璈多遠音我無雙飛翼失路杳難尋安得如珠黍聊用慰我心

潭中有浴鳥相傳是鳳皇不飲復不啄徧體生文章商風西北起將舉復廻翔世無梧桐枝爾當遊何方

石洞何陰陰中有千章木山風日夕吹霜條森似玉苦節諒不移肯受膏雨沐百卉在沃壤芬芳徒過目志士處憂患焉知不爲福

涼風日夕至吹我瑤石臺嚴霜被野草嗷嗷清猿哀俯視見流光悠然生遠懷寂寞天華宮豈無歌舞來焉見安期生羽衣變寒灰

浮山道中

李雲龍

志四

六

中峯已奇絕上界更迢遙瑤草經秋長仙雲滿地飄石林開紫府磴道上青霄羽客長松下邀予度鐵橋

道中寄張子孟奇太守

李雲龍

三峯天半出蒼翠望中遙石路紫煙積山泉秋雨飄梅花頻入夢琪樹遠相邀願託雙飛燕從君度鐵橋

石洞

明周一士
貴謬
東莞

萬象森羅于此羣仙晏坐其中別是神工鬼斧居然玉宇瓊宮

白雲洞

明梁可瀾
元叔
順德

人遊仙洞多迷路惟有仙源路不迷一片白雲開洞口野人還住小巖谿

羅浮雜詠 自註寓石洞中作

明張穆 鐵橋東莞

芳綠靜含煙懸泉散碧天春山不須買石上剩青錢
坐石拂谿雲山空羣籟絕無心理釣絲愛此一潭月
寒梅萬樹春十里入香雲夢與縞綃遠參橫翠羽聞
夜涼山雨佳燃燈校仙籙雲晴溪氣香窗外胡桃熟
入谷聞空答溪深六月寒松風三十里常作九秋看
肅肅霜林靜高巖懸玉鏡何處壑中猿一嘯千峯應
過雨濯芙蓉輕煙散桃萼曲澗吹古香流入西窗角
石榻夕不寐松風鳴夜絃二更山月曉蟾影覆人眠
邈矣逃閭叟高風不可親白雲緘石室留取付閒人

山中吟

張穆

志四

七

采芝暮言歸紫雲生谷口山空明月秋倚石不知久

酥醪村作

明屈大均 翁山番禺

梅花村北酥醪村家家爭釀梅花魂梅花與酒一時熟香
吹羅浮當朝噉山人嗜酒日沈湎醉來跌破蒼苔痕大嚼
梅花貪醒酒消渴藤斷窮株根麻姑酒田亦不遠往來壚
側常鯨吞麻姑要詩作酒價一篇動揮千萬言撫掌大笑
李太白眼花落井空昏昏酒星墮地不歸去化為酒泉長
注奔文章亦與酒泉似波濤洶湧傾龍門白頭潦倒每一
石螟蛉果羸淳于髡呼吸水露作玄碧飈車一去凌崑崙

杜鵑峯作 自註峯乃羅浮高頂

屈大均

浮山頂上花萬千一峯花獨多杜鵑色兼藍紫與黃者絕

少殷紅猩血鮮開時無葉但枝幹槎枒屈曲相鉤連浮山
舊多海底樹豈鐵珊瑚風吹堅定知不是子規血不然望
帝成神仙春心已得丹砂化蠶叢舊恨都棄捐謝豹亦作
搏藥鳥口中長吐瑤池蓮開多黃色得中氣與金芙蓉爭
麗妍西蜀安得有此種啼痕霑濕迷荒煙斑斑臙脂自太
古那能化碧沈重泉龍爲魚兮誰不苦瀟湘之竹同煩冤
噫吁嘻瀟湘之竹多煩冤

賦得胡蝶繭贈王黃門幼華

屈大均

羅浮胡蝶有洞穴天蛾吐絲白如雪千絲萬絲作一繭仙
胎只爲鳳車結終日纏綿如有情變化一一通神明繭中
久蟄經霜雪雌雄之雷不能驚枝間厚裹烏柏葉山人采

志四

六

得盈筐篋四百峯邊大小村家家皆有大胡蝶黃門近自
京華來邀我共上麻姑臺不愛紛紛五色鳥不求朶朶同
心梅只憐鳳子多香繭神物人間知者鮮攜歸置在梧桐
間明歲車輪雙翅展仙人騏驎最相宜莊得其雄老得雌
雲霞衣服誰能似日月精華總在茲君亦當年句漏令自
入羅浮多嘯咏鮑靚丹爐造未能袁宏山疏題初竟千金
何物作裝還胡蝶之繭徒斑斑已擲沈香教作浦更包錦
石使成山

從軒轅宅入迷居洞

屈大均

曉起蕊珠峯行行花影重林鳥飛落月山鬼嘯寒鐘野飯
芝泉冽秋衣竹翠濃昨宵逢道士疑是七星松

自註洞有古松七株

號七
星松

暮自瑤石臺與具公荷薪歸

屈大均

盤雲一徑微與子荷薪歸落日搖溪閣長風亂草衣夷齊
空抗節園綺未忘機明又西峯去毋言苦行非

鐵橋

屈大均

二山相接處賴有一飛橋天作羅浮帶無令逐海潮
橋下一飛泉散爲諸瀑布泉界羅與浮仙人不得度

詠羅浮

屈大均

浮山浮海自東來嫁與羅山不用媒合體真同夫與婦生

兒盡作小蓬萊

四百三十二兒孫上界自註峯名飛雲自註峯名勢並尊
浮山絕頂

志四

九

浮嶽不將羅嶽去白雲長鎖洞天門

羅浮胡蝶歌送屈翁山

明陳恭尹獨漉順德

羅浮大胡蝶言是小鳳皇六足盤胸間四翅交文章修眉
若楊葉繡腹如垂囊仙人愛文采挾之游帝傍雲霞爲友
朋沆漉爲酒漿倦息珠闕上飢采若木英四海安足飛來
下君子堂堂中有行者比德共翱翔

懷羅浮

陳恭尹

琪樹西風粵國秋十年前記住羅浮山光一半來蓬島海
色三更上石樓雲護藥苗侵臘長寺分泉響入房流葛洪
丹井分明在一下人間漸白頭

李蒼水司訓長樂以羅浮蝶繭數雙及繭布見寄云

布卽蝶繭所成翼日蝶出繭中五色紛披翫對之
間因成一律寄謝其意
陳恭尹

仙遺衣化羅浮蝶蝶化山蠶復作衣栩栩未離莊叟夢絲
絲還上玉人機質無綺麗宜於隱生有文章不愧飛多謝
良朋遠相寄東方蟬蛻亦依稀

入羅浮任石洞作

二首

明何

絳

不偕
順德

清晨策高足來遊羅與浮投身人石洞暫息石上樓流覽
先賢跡道德良難傳日夕涼風至深谷有餘秋自吟還自
咏茲事復何求

微風動林木細雨飄然至秋盡氣還佳蕭蕭入我寐攬衣
念前哲明時上封事骸骨歸山阿學術承洙泗悠悠百年

志四

三

內俎豆存真意聖賢久不作斯文恐將墜嗟予老未聞徒
然負此志

歸羅浮石洞作

明

僧元覺

離幻
順德

相逢多不語此別復何言濁世能無我閉身自有邨名峯
聞積雪古木下寒猿若問還山路郎官舊洞門

石洞懷友人

僧元覺

雲過百花陰人歸一洞深易尋仙子跡難著世間心好鳥
鳴高樹涼風吹素襟長吟發清響何處寄知音

初入羅浮寄呈石洞本師

明

僧成鷲

跡刪
番禺

萬事皆休豈復疑美中不足但違師眼前耕鑿無關道心
在穠鋤漸廢詩坐對潺湲通語默厯窮岑獻得平夷主人

欲問羅浮事荆棘當門花滿籬

羅浮山居三十詠 錄六

僧成鷲

閒身初住鐵橋東回憶家山事事同
就樹選藤增健僕入林逢藥慰衰翁
峯高豈礙當中日谷靜常來正面風
誰信嶺雲猶可贈不堪持贈但長空

洞門不掩有雲封土面灰頭學老農
野菜盈筐因長笋枯柴充擔爲憐松
地爐自種經旬火水碓長流隔宿春
莫道此間寡鄰竝午齋風送遠山鐘

年來得力是忘機物外孤心漸入微
蟲惜清聲終夜語鳥因昭質傍林飛
憑他風雨能侵席到處晴陰不掩扉
半角好山誰作主自憐臨老始知歸

志四

三

宿雨初晴策短藜看雲行到亂峯西
眼前圖畫無人繪皮裏詩囊且自攜
果熟靜觀連蒂落松高曾記與眉齊
分明一簇香風過開遍山檀又木樨

清晨客至暮方還問我何心住此間
在世但知聊寄跡旁人都是居山近
嫌路有樵人識漸覺門須待子關他
日與君相見處斷崖移屋不堪攀

飛雲天半碧層層萬仞孤峯不易登
行遇斷崖看撒手去當無路莫牽藤
一莖細草皆成藥方寸閒田可住僧
多少懦頑難到處程途終日間南能

望羅浮石洞舊隱

僧成鷲

羅浮如有情相見若平生知我舊賓主
隔江遙送迎片雲

封石洞孤鶴下朱明是處有人在半空聞嘯聲

羅浮蝶歌

國朝 梁佩蘭 藥亭南海

麻姑善狡猶髻象蓬萊峯渾身披五雲光散金芙蓉遺衣
化神蝶慣拍珠樹叢其大如車輪翩翩吹香風小者若團
扇往往煙霧籠兩翅耀星斗分列西與東繡腹成錦囊黼
黻非人工豈無綠毛鳳亦有金花蟲徒然具形質文采焉
能同我從瑤石來洞門尋仙蹤信爲鳳凰子蹁躚摩高空
安得騎汝回騁轡鞭茅龍

羅浮五色雀歌

梁佩蘭

仙雀乃帝王宮殿羅浮山五色辨五服羽翮不亂班大紅
爲君絳其羽別色爲臣奉其主紅何光華芙蓉砂綠何新

志四

三

綠菖蒲芽黑爲漆白爲玉黃爲黃金并黃玉續續紛紛百
千成羣雲霞出入同仙人仙人來遊雀歡喜飛動翼止動
尾異人來遊雀逍遙一日數集如數朝朝時吐音如吹簫
送離幻禪師歸羅浮石洞

梁佩蘭

漸老妨幽獨逢人感別離那堪當臘日相送更禪師孤雁
聲何切閉雲去不知名山精舍在想見護寒時

羅浮胡蝶繭

梁佩蘭

生氣鴻濛古真形物化微短長山葉裹團結洞雲飛抱朴
中含子流黃自有機麻姑長指爪拾取製仙衣
神仙騎不得作繭未成蛾方寸藏身穩雲霞釀氣多金丸
無可比玉局更如何一笑人間世勞生在蠲磨

掘黃精

梁佩蘭

名山自閔藏藥物土中肪綠髓含黃玉靈根結太陽幾經
霜雪盛不散石林香掘向羅浮頂長鑿七尺強

東官客舍屈五過譚羅浮之勝時因道阻不得遊悵

然有懷作詩三首

錄一

國朝

朱彝尊

竹垞
秀水

勾漏來仙令神靈得鮑姑丹砂不死藥竹葉辟兵符白日
飛蝙蝠紅雲泣鷓鴣何能振衣去敢復計窮途

望羅浮

國朝

趙執信

秋谷
青州

昔遊東海觀蓬萊宮闕晃朗金銀開扶桑墜枝生夜夢火
輪飛破琉璃堆南紀羣真羨奇麗狡獪鞭石驅龍雷偷移
左股作戶牖青天突起瑤石臺飛雲列隊引羲馭欲與岱

志四

三

嶽爭風霾朱明洞中夜奏樂瑤池半入流霞杯巨鼇伏罪
坐失守千年斷骨霜皚皚我是安期瓜棗使泉源主者無
嫌猜乍可老人賜顏色敢向玉女通談諧擬尋松徑窺上
界鳳皇去作高辛媒珍禽聯翩迓貴要洞天猶爾吾何哀
神丹火冷竈土埋虎暗詎敢瞋狼豺自註山中
方多盜靈異剩訝
仙壇竹橫斜莫問荒村梅空明九百八十瀑不為逋客湔
塵埃片帆搖曳蕩寒碧長煙落日相徘徊江迴目徙幾圖
畫持較登眺誰為佳譬如對酒不得飲且復飽玩金尊壘
東皇大笑君休矣春色指顧生陽厓赤芝青飯久相待但
欲掃灑太古苔會探風雨合離處袖擘海山歸去來

重望羅浮見雙瀑二絕句

錄一

趙執信

偏傍仙山得好晴，泉源雙落望分明。青精生有招人意，白水巖惟放佛行。

與莘田翁山飲梅花村竹樹下望玉女峯麻姑臺

國朝王又旦幼華邵陽

名山勵藥已盈東，攜手下山玩山曲。不辭空翠滴衣裳，頗愛墟煙散紅綠。紅綠藹藹入平沙，近傍仙人賣酒家里俗。但傳東嶺背居人，誰問南枝花林中。列坐藉泉石竹爲四壁，石爲席，千嶂猶埋霧氣深。二樓忽漾日光赤，起看秀色何嬋娟。繚繞雙峯絕壁前，眼明如過清虛府。身輕欲踏蒼浪天，百榼縱橫待夜靜。環珮珊珊下高嶺，不辨麻姑與鮑姑。滿天風露青筠冷。

按東嶺背指浮山東麓之背地近石洞此古梅花村址翁山導遊固不誤

志四

三

也

自朱明洞經青霞洞至石洞

國朝顧嗣立 吳門

凌晨辨色起，興賈兩足健。盤餐忘粗糲，空腹飽白飯。相攜非素心，同行亦纒綫。野人導我前，露珠泣葛蔓。曲澗浮菖蒲，滴瀝沫飛噴。巨石乃耀真，古洞光徑寸。相傳下無底，日月明夜旦。上有野人廬，門前伏虎圈。真人去朝天，苔蘚空延曼。行行抹山頭，犖确共推挽。蝦蟇石彭亨，百花徑爛熳。泉紳千尺長，石壁自崩奔。披尋青霞洞，大字積塵盆。雙石號挂冠，新語費評論。何人施斧鑿，殘山滿遺恨。

自註挂冠石一砥一

峙翁山新語稱爲傑出近爲冲虛觀道士採爲殿宇之用

白雲鎖巖阿石門，自天建廓

仙去不還山花笑，婉婉西華迷。榛蕪廣莫在濁淵。

自註石洞有西

華道院廣 枯草長於人逃闔此中遯自註逃闔為賓白慚

莫庵遺址 落泥塗舉止同負販何當乞刀圭一遂初平願

五色雀

自註五色雀海南人呼為鳳異物志謂山神使木客鳥迎貴人即此雀也

顧嗣立

羣飛數十弄毛翰五色離披亦可觀漫託仙家呼小鳳俗情只把貴人看

竹葉符

自註生劉仙壇左右葉上文如篆籀

顧嗣立

翠葉縱橫畫不如斬蛇驅虎降天書劉仙秘訣難傳得留伴芸香辟蠹魚自註劉禹錫詩秘訣猶傳竹葉符

上界三峯

國朝 劉世重仰山香山

萬仞丹厓十洞天直排闥闔賦遊仙峯峯鼎立虛無裏步

志四

三

步猿攀日月邊石白靈苗僧採藥水簾飛瀑客採泉行逢皓髮鈔雲叟招手青羊話紫煙

鳳凰谷

劉世重

雙山縹緲絕塵蹤木客追攀信短筇出洞有雲時五色入天無雨自三峯池開夕照翔文鳥石憩蒲團偃法龍何處仙人鸞鶴奏月明深夜聽淙淙

遊鐵橋

國朝 陳之璠非赤博羅

索幽策輕杖霏微縱登眺危磴接穹窿靈邃矚幽邈沓翠攢駁掣光煌現仙嶠所蘊氣何奇陸離經爍燒飛湍噴錦淙洶洶時熠耀綠篠遶鳴禽懸崖棲返照仙人不可即對此神思渺愴恍寂闕中獨發蘇門嘯

鐵橋

國朝 繆時鳴 西冷香山

鐵橋雙險絕上下寒雲垂逝者自今古山情無合離水龍吟澗底秋石長蓀枝白滿東樵月吹簫獨過時

萬年藤杖

國朝 宋廣業 澄溪長洲

老藤生長仙山裏自古盤根不計年還與老人歸掌握朝辭陽谷暮虞淵

竹葉符

宋廣業

朱書綠葉換青蚨野老相傳辟蠹魚借問韋編三絕後不知何處著仙符

遊石洞作

國朝 楊應琚 佩之奉天

余聞石洞中前人多碑碣跋涉披草萊欲探幽人窟怪石

志四

美

何纍纍盡是青山骨飢來我欲烹山中拾榾柮側身緣溪行泉沸聲清越竹木鬱陰翳猿猴時出沒前有洗耳池可以鑑毛髮一掃洞中雲坐待山間月

自白鶴院至酥醪觀作

楊應琚

羅浮四百三十峯我今直欲窮奇蹤遊遍山前來山背四百峯巒貯余胸山高細路掩荆棘下臨澗水聲淙淙遊人頂踵互相接唯余杖策常從容偶然回首失羣山千里一望海漫漫不知身世在何境恍如兩腋生羽翰須臾雲散天地開鳴禽蝴蝶相追陪日午已至酥醪院茅屋數間雲水隈從者飯畢各偃息余猶攜酒登高臺

和修上人午度佛凹嶺之作

楊應琚

度嶺日將半肩輿至此停路餘一線白樹拔兩峯青虎露
懸崖跡龍翻澗水腥衆人驚險絕我欲瞰滄溟

題了髻峯

楊應琚

不解麻姑意何來羅水陰雙鬢出天表四面隔雲深我欲
踞山頂爲君插玉簪會當風雨至幽思杳沈沈

遊符竹峯下西溪

楊應琚

符竹峯頭雲半遮杖藜先去水西涯一灣折處成幽壑幾
道飛來濕落霞傍澗石窩如井臼縛松藤蔓似龍蛇羅浮
此是最深處更有深山山外斜

宿酥醪院晨起口號

楊應琚

石徑逶迤古木疎道人飯我摘園蔬小樓一夜空山雨澗

志四

三七

水新添數尺餘

登酥醪觀前山望白水門

楊應琚

白水門高縱目看碧峯尖處水漫漫飛泉直下三千尺十
里吹來毛骨寒

五色雀

楊應琚

本是蓬萊種何須去上林無心常得見有意不能尋却似
鳳皇色而懷鷗鷺心羅浮峯四百棲止一何深

楊制府應琚

屢爲羅浮之遊勸駕因循不果用東坡

白水山佛跡巖韻奉呈

國朝

杭世駿

堇浦
仁和

年衰百事慵枯坐養腰股幸期免顛頓豈望生毛羽名山
不到眼好句那得吐境如抹電過驚悔後莫補緬懷朱明

洞蒼石滴成乳練形足砂牀餐秀需藥斧可憐七尺軀未
踏兩山土昔遊數我公稱說輒眉舞健句截寒鐵清絕誰
繼武沈思強屬和毋乃類駢拇勝踐無俗朋涼秋有微雨
距躍已三百作氣思一鼓支筇度鐵橋騎羊叩仙府導路
仗靈雀巡山逢啞虎羣真或見招精魅敢余侮以此欲往
心匹若鑿辭弩奈何俗械纏微旨今乃睹把公一卷詩隨
宜且領取公來我未往風雅久無主山靈解笑人吾其老
農圃

謝錫大將軍惠黃精

杭世駿

返黑思黃獨羅浮產最良
刷來鴉背膩馱送馬蹏香靈液
蒸丹竈山苗曬石梁
方言聽漸熟知是野仙薑

志四

三

陳秀才

世堂

遊羅浮歸以胡蝶繭丹竈泥竹葉符見

詒報以二律

杭世駿

幽禽喚客入林齊
方物勞君次第齋
柏葉密封三寸藹
露華新搗一丸泥
爛燻豫想仙袞豔
下上愁尋藥竈迷
何日醉騎胡蝶背
招真同過石樓西

深山蛇虎久潛逋
爲有蕭梢竹葉符
冷共女青森鬼律
巧

憑蟲蝨篆繪靈圖

自註道藏以符籙爲靈圖

吹來石洞雲填廓
疊向巾箱

墨印膜夢想劉仙
壇畔坐翻翻細認
不模糊

羅浮胡蝶歌寄蘇博羅杏浦

國朝

張九鉞

紫峴湘潭

吾聞祝融火德司南方
離明府啟爲文章
羅浮南嶽之佐
命山川靈氣紛翺翔
葛仙五銖衣鬱鬱藏
不得麻姑五色

裙翩翩曳無力散入蓬萊第七天化作如輪彩胡蝶丹泉
渴飲芝療飢鐵橋瑤石相蕃滋六朝洗盡金粉色七襄織
就天女機真文紫篆巧渲染得非四百卅君遊戲之所爲
五月晴霞炎海起上界三峯不見底紛紛百萬羣遊遨高
舞低旋燦錦綺撇然一逝隨長風茫茫大壑天如水亦有
收之入行簾詩卷梵經相夾東韓憑魂魄萬里歸仍伴珊
瑚花裏宿迺知出自釣天居海眼丁香未足殊謝逸何緣
搜入句滕王那得品成圖蘇耽此地神仙吏異物休辭遠
難致何當踏上石樓峯相與騎之謁天帝

羅浮六首 錄二

張九鉞

排風大翮傲天關百粵鴻濛一氣環萬水東來浮絕島九

志四

无

州南盡見名山璇房瑤室虛難問白犬丹雞去不還生在

朱陵知地道短衣來往碧雲間

自註衡嶽朱陵峯下水簾洞有地道通羅浮山

桂父顏因入世靈安期鳥爲避秦停誰教五百童男女盡

種三千老茯苓天地荒唐周甲子衣冠龐古漢圖經而今

耕稼無私地望裏虛看似畫屏

自註三十年來諸峯巨竹奇樹爲種耆叟盡悉墾

荒種粟僅存空寺觀而已。按羅浮諸寺觀古松甚多云
僅存空寺觀蓋不盡然惟墾荒種粟實自乾隆初酥膠開
闢亦在斯時又按廣東新語歸善有密峯其人耕無犁鋤
率以刀治土種五穀日刀耕燔林木使灰入土土煖而蛇
蟲死日火耨是爲畚蠻之類紫峴所稱種耆
卽此畚耆俗皆讀如斜今山中耆人已他徙

賦羅浮胡蝶蘭

國朝 嚴長明 冬友 江虛

麻姑生齊陽散髮事王遠一朝得仙去譬若蛹脫繭靈裊
颺清風翾忽莫可挽化爲栩栩蝶遊戲洞天晚余家近良

常羣真夙所館潛通朱明天幽約時復踐嘉雀質五色皓
雀聲百轉桂蠹金花蟲種種各心譴鳳子尤所珍惜爲列
仙遣入夢偶飛來作伴時苦短耳山行自南方物此其選
依持若同功未忍遽分散密須絳葉黏輕藉遊絲卷綴如
九子鈴比若兩角銑貯以越紗籠寘之湘竹篔見乞剛一
枚珍重抵玉琬爲言清夏交溫風綠窗滿定有神蛾來妖
嫵莫窮眄兩兩倏乘風翾飛泠然善小猶鏡屏張大者陶
輪展扇面七華開幟心九霞翦彼哉葛稚川抱樸寓遙嶽
莎裳木葉衣相視應有覩而我貴沈冥顧此情獨爾本
餐霞姿仙都恣遊行偶因文采彰終被世塵沈唐花飼豈
堪蠟樹棲難穩且隨燕蟄冬莫效虬逐暖好讓墨蛾飛悠

志四

三

揚向秋阪作貢華林園描摹付班管

自註秋過熱河東砂石阪地產黑蝶大者

五六寸土人呼爲墨蛾蒙古人呼爲額爾伯克伊秋中例以百枚進

御云如意館中需作粉本也。按耳山上海

陸錫熊號

羅浮龍葱竹歌

國朝

張大進

海門番禺

君不見羅浮修竹挺千尺天心月脇相逼迫其葉巨如蕉
飄風不撼撼何誕之節兮欲覓了無跡此君常恐化爲龍
穿雲拂日胡爲至今徒龍葱爲杖葛洪不敢跨峯巒四百
偕虬松我欲斧作槎追逐織女回雲車乘風萬里銀漢之
涯又欲剖爲瓦可創千百間廣廈以室無廬者又欲炙爲
簡赤文綠字任書無限上自石渠天閣下迄神林鬼塚詭
異所傳靡不修撰又欲截爲簫爰命防風吹之其聲駭長

空龍慈竹兮龍公竹兩山離合間俯瞰羣材皆樸橄黃岡
篁第爲耳孫阿誰更數篔簹谷

明福洞尋鄭湛若先生讀書處

國朝 梁序鏞 雲門 南海

羅浮四百三十峯風雨離合青濛濛神仙窟宅指可數此
境幽異何巖崿蒼崖翠壁鬼斧削煙霞繚繞窗玲瓏春巖
浮翠濕衣袂流泉聒枕聲淙淙誰人仙去別雞犬爐餘宿
火丹砂紅海雪才人絳霄謫執戟取學金門客猿公劍術
季布豪五陵裘馬輕相擲狂生自謂我非狂讀書愛住羅
浮宅龍威竊窺洞庭篆玉犬遣守娜環冊焚香更抱綠綺
琴一彈再鼓鸞鳳吟鸞鳳遠在丹山岑招之不來傷我心
殘雪在地鐘乍沈香風襲襲梅花林石門歲久秋草遍幽

志四

三

堂局鑰雲雷陰遺書恐蝕羽陵蠹帝勅六丁相攝尋人間
流傳却絕少誰搜石室窺瓊琳嗚呼誰搜石室窺瓊琳松
花寂寞蒼苔深

入羅浮宿九天觀

自註舊爲明福洞鄭湛若自號明福洞主卽此地也觀後爲西華道

院舊址

國朝 張維屏 南山 番禺

我尋明福洞遠赴列仙期海雪自千古山花長四時西華
春不老北斗夜何其似有鈞天奏長空鶴下遲

由九天觀訪劉仙壇

張維屏

步虛聲裏未能眠手把芙蓉出九天借問仙壇何處是老
猿遙指洞雲邊

佛子嶼

張維屏

山勢盤凹形人行作之字磴道五百丈欲登鼓其氣福地

乃設險仙靈有深意一關森虎牢衆醜息蜩沸自註壬戌土匪之亂

駐兵於此時平遊屐富先後裏糧至劍鉞割陰陽鐵壁抱蒼翠

俯窺地軸深采入立邱閱嘉名易分霞丹崖待鑄識自註余易

其名曰分霞嶺彩禽翩來迎定是花鳥使自註過嶺多五色鳥

黃仙觀

張維屏

手持一瓣雲去謁黃野人野人渺何許笑語空中聞似云

舊相識小別三百春丹邱有故宅曷爲戀紅塵我仙非餌

丹紀載多失真山頂有玉池泉味如酒醅一酌消百憂再

酌忘其身遠巡四五酌飄飄躡天根天根亦非遠醉後時

可捫子來勿憚勞蝶翅如車輪

志四

三

出茶山洞望小蓬萊諸峯

張維屏

木勢欲無山山勢欲無日層巒巧彌縫衆綠森密栗天公

方作畫雲氣噓墨汁長風助揮灑萬竅一時溼迴頭電鞭

馳到額雨點疾陽厓飛溜過陰洞遊客出不憂高磴滑但

惜奇景失峯多頸屢延水涼髮如櫛黃昏抵酥醪仙漿飲

能必

晚入酥醪洞懷黃香石

張維屏

千峯裏一洞似出人境外居民無機心飛鳥有靜態觀山

誤皮相往往失肩背誰與妙縵幽之子實稱最惜哉不同

遊賞奇但孤會攀蘿屢踟躕樵風送虛籟

宿酥醪觀夜登斗臺

張維屏

仙人亦酒人酒後善遊戲至今醪醪洞風露皆酒氣我來
吸空香未飲意先醉諸天綠濛濛仰見星斗翠月描神女
眉竹寫安期字自註洞有符竹定雲野猿縛慧水毒龍制何必乘
飈車心出人間世

洗夢軒夜坐

張維屏

春山夜未眠笙磬落風前屋後萬竿竹枕邊三疊泉斷雲
歸洞暖孤月出波圓一夕蒲團話心空不是禪

有酒 并序

張維屏

三月一日分霞樵客宿于稚川北庵醪醪一杯不
覺竟醉酒醒夜半開戶出視雲氣離合妙香徐來
偶爾會心欣然操翰豈謂性海情塵頓歸般若亦

志四

三

欲青肝蒼腎同葆谷神

有酒灑灑百年電速渴驥奔泉枯魚上竹神離絳宮鬼瞰
華屋醉飽優倡飢寒戚族前堂高歌後戶低哭鏡花春紅
墓草秋綠誰歟慧業識字憂伏紙蠹何功繭蠶自縛索米
一囊嘔血一斛老佛攢眉上仙捧腹與爾靈丹非草非木
爾病自醫爾藥自服病在有求藥在無欲大笑嚙之百骸
如沐

浮山第一樓題壁

張維屏

一酌醪醪骨欲仙樓高覽盡洞中天心飛海日三神上身
在蓬萊左股邊桂父叩門談服食麻姑招手話桑田拍肩
又被洪厓笑我墮塵寰六六年

斗臺古松

張維屏

支離一隻笑相逢袖拂蒼苔曉露濃他日畫圖添故事羅浮深處拜孤松

自註余見老松輒拜人為作拜松圖

登分霞嶺望上界三峯

張維屏

天衣千萬層霞采密無縫雲來綯丹青雲去幻鸞鳳身輕手孤攀胸盪目雙縱三峯爭作嶽眾阜忽成壘海浮一綫白嵐蝕半厓凍青冥如可梯歸風引飛鞚

山中雜詩

張維屏

瓊漿一吸勝丹砂不使相如渴病加采得春前雲霧葉底須重覓趙州茶

志四

三

被旁人道是仙

出山四十里至九子潭登舟留別瀛濤

張維屏

相送澄潭口桃花照去津石爭歸洞水雲戀出山人彩蝶霞衣麗黃精露髓新更攜泉一甕分贈到親鄰

聞南山遊羅浮賦寄

國朝譚敬昭陽春

香石愛羅浮年來曾五遊君今成獨往到處足冥按古洞仙衣化靈巖佛跡留蓬山躡飛鞋真作一囊收

寄題分霞嶺

國朝翁方綱覃溪大興

羅浮二山界舊名佛子凹蓬萊之左股鵬羽掣六鼇到此蒼翠間風雨氣乃交分霞名初勒五色鳥所巢

自註南山分霞嶺記

云此地多五色鳥遠寄五字題墨湧千峯高笑酬張子意補昔伊守勞自註昔伊墨卿守惠州有書來云羅浮山中未有覃谿詩今此補之琅然少霞銘聲接大海潮

奉酬瀛濤道人寄藤杖

翁方綱

蒼藤飛起鐵龍精磊節蟠鱗石骨錚是我泊船榕嶺下鏗然相應寄詩聲

粵嶽頌

國朝

黃培芳

香石

斗南一嶽天外三峯子夜觀日羣仙駕龍

酥醪十境詩

黃培芳

山深世隔懷葛為鄰醉餘香露松竹留人

酥醪洞

邱壑幽杳洞門鎖春遊人大千誰其問津

小蓬萊

志四

三

空山天籟風林蕭蕭飛流不斷惟石嶢嶢

茶山

幽谷人來樹下成蹊采采菖蒲深澗雲迷

梅谷

誰將翠黛點破山骨千載澄泓照澈毛髮

疑碧潭

春山濯錦水流花開一條白龍天外飛來

白水門

仙人歸來自煮白石融液天漿可與共食

石竈

壘石為砦滙流成陂孰奏鈞天風水漣漪

下陂

茅坪雨歇眾嶺含煙返照入林高峯蒼然

符竹峯

雲根選勝石互泉飛何必漢陰到此忘機

忘機石

入羅浮宿九天觀

黃培芳

羅陽溪口乍停帆路入玄都迴不凡初辱名山為地主竟

將仙客署頭銜

自註余到觀即署號九天仙客

當門曲澗環疎竹背嶺高

垣列古杉滿目煙霞煩指點題詩明日遍層崑

洗耳泉

自註閩人林民止爲
葉化甫先生題勒石

黃培芳

泠泠洗耳泉耳洗心逾清自足空谷音殊異巢父情當年
築逃菴非爲學無生時違道在隱遑計後世名我來希高
蹤於斯濯塵纓山泉信知意千載流幽聲

佛子嶼

自註嶼
一作凹

黃培芳

名山亦設險佛嶼勢盤固入山行漸北雲峯百盤度暫息
磴道旁懸崖蔭孤樹白茅風蕭蕭知有虎豹路登頓陟危
巔形勢豁呈露內衛一洞寬浮山特屏護往年騰妖氛王
師此停駐兵氣久已消指點屢廻顧草木生仙區何至委
煙霧乃知巨靈意設此不無故斜陽下平坂神竦雲中成

志四

三

酥醪觀

黃培芳

林巒三面合仙觀隱煙蘿與世漸相隔入山深若何蒼松
含籟遠古桂得香多欲問長生訣餐芝獨寤歌

題酥醪觀小樓

并序

黃培芳

仙人好樓居而羅浮頗妙精構道人江瀛濤築小
樓於酥醪觀之陽擅一洞之勝余顏曰浮山第一
樓酥醪故葛洪北庵昔安期生與神女觴此

羅山踏遍少樓臺洞入酥醪傑構開萬壑煙雲浮檻出半
天松竹拂窗來稚川此地曾高卧神女何年更舉杯我且
置身高百尺憑欄清嘯動林隈

自凝碧潭至黃石處

自註俗
名石竈

黃培芳

捫蘿緣溪行行逐麇麇迹溪瀦忽成潭千載照人碧高崖
積翠寒迴與人境隔山骨何年穿玲瓏現竈額石嚙水逾
急湍澗水激石天寒吹雪花仙人煎玉液

小蓬萊

黃培芳

蓬萊分一股羅浮鬱輪困更有小蓬萊乃在浮山垠道人
導我往初入纜通人路盡豁開朗巖壑紛嶙峋前後環峻
嶺左右迴激湍清泉流濺濺白石磨粼粼喬木入圖畫幽
絕疑無倫坐臥水石間耳目皆天真古磴造平坦良田闢
畦畛一峯如翠屏千竿長綠筠結屋三五家疑是無懷民
盤谷無此幽輞川遜其清契我竹柏懷妙遠怡心神何須
理煙棹更問桃源津

志四

三

忘機石

黃培芳

窮源屢行谷底入山已到雲根一石下臨飛瀑兩人對坐
忘言

浮山古銅盤歌

自註瀛濤道人江本源贈

黃培芳

安期遊戲挽銀潢招邀神女傾天漿呼吸山濛仙露涼滿
山化作酥醪香羣仙來睨相翱翔遺下銅盤埋土岡仙人
法物竟沉陸春雨龍耕破山腹千年久瘞白雲深一朝忽
見榮光燭道人拾取濯溪流隱隱苔紋起寒綠珠宮紺宇
藏古珍瓊笈雲房同秘錄道人瀛濤豪俠儔慨以此寶歡
見投我昨來從丹竈遊遺磚曾獲山之陬信是仙家不我
拒重使神物能兼收百回摩挲知不厭二難合并還何求

攜歸尙帶煙霞色觀者流連生歎息從容吟嘯置坐隅細
檢爛斑土花碧從此幽齋多古情芳樽同伴風月清君不
見漢武銅盤空折取九霄飛露凍金莖

自酥醪出山是晚至增城

黃培芳

壺天小住雨絲絲候得新晴出洞時流水亦知遙送客名
山難定再遊期千峯高處行偏健百里歸程去獨遲晚抵
增江殘照紫蕪香還展菊坡祠

戊辰歲暮重遊羅浮

錄七

黃培芳

歲暮方輟講遊興如有神儻問家人業意氣何時伸黃冠
適招我高堂告慈親親言終歲勞許爾暫閒身飄然攜笠
屐漸遠世路塵君看武陵叟重來已迷津我復遊仙山崑

志四

三

非澹蕩人

四百三十君一見先歡然問我來何暮揮手開雲煙行行
入深處猿鶴導我前此來務緹幽無失背與肩泉石如有
待一一爲銘鐫

初入酥醪洞梅樹如瓊瑰小住三五日桃花相繼開洞中
本常春非關春意催隱几明窗下皎潔無纖埃夜來月照
席不寐空徘徊仙風吹暗香美人來不來

言遊白水門羊腸不易度道人知我意猺子先葺路飛流
破空下千仞拖練素峯頭多杜鵑開時燦春暮近睇上界
峯咫尺若可赴天風忽吹雲四山墮煙霧隱隱雨將至不
得騁高步冒險宜可行遺體當自顧

武林有胡生寂寞淡心迹自言寡所營獨有煙霞癖一朝
不我期邁往逾宿昔跨步飛雲巔清風生肘腋歸途猝有
遇草笠青衫客相呼不相識相視心莫逆古洞謁黃仙儼
然此標格平生慰所願仙緣紀貞石何時同驂鸞點破寥
天碧

水岩僻逾勝梅谷遠彌幽竿籟蕭蕭動琴筑涓涓流白雲
眠英英翠鳥鳴啾啾衣裳藉羅磴坐久心悠悠山深不逢
人來往空夷猶

我欲飽看雲天公催作雨蒼鬱彌萬壑變態紛可數如翻
渤海濤忽曳長天組一峯作羸頭一峯倏露股雲生旋雲
滅峯峯互吞吐雲中誰往還隱隱聞仙語願隨雲中君飄

志四

三

然事高舉

酥醪觀中贈胡栗堂

紹益

黃培芳

栗堂山人性孤矯愛向羅浮散襟抱山中并坐清晝長爲

我行滕開墨寶

自註以語晉齋餞吳穀
人先生詩墨蹟見示

鳳翥龍翔下衆仙

煙霏霧結攜春藻

天家辭翰不尋常題詩特送錢塘老

傑句應推海內雄長篇劇愛河間好兩山風雨合復離對
此真同冰雪燥酒熟不聞神女來庭間擬待麻姑掃梅花
未落桃花開天壇永歲生瑤草看君神氣朗若仙風骨峻
崢嶸枯槁明年更道上天台此行已共登蓬島君歸持此

質詩仙

自註謂穀
人先生

語雜煙霞魄探討

藍門投宿越日至酥醪觀二首

并序

黃培芳

自絕頂下雲深失道誤行三十餘里是晚至藍門
村寄宿野人家斗酒隻雞枕稻草而卧蓋身在仙
鄉不知人間世有列鼎累袍之榮也明日梯雲越
嶺迺至酥膠

貪弄雲煙徑路差殘陽投宿野人家醉餘一覺遊仙夢休
問桃源舊種花

攀雲陟磴出深山又訪玄門仙露間莫笑昨宵曾藉草浮
生草草幾人間

題胡栗堂遇仙圖

黃培芳

絕頂看雲飛攜雲下翠微水邊招手處天外振衣歸竟爾
逢仙話飄然與世違至今開畫卷風雨想依稀

志四

四

癸酉臘月五遊羅浮溪上阻風舍舟步行入山晚宿

九天觀

黃培芳

清溪發孤棹詰曲林樾邊空青壓船頭峩峩欲橫天白雲
喜招我玉女明娟娟相隔數月耳

自註是秋曾遊

乍覲猶堪憐石

尤方倒吹舟子一纜牽逸興詎能遏入山思爭先慨然舍
行李飛步如飛仙反顧舟中人波間空洞沿

入山何所適日夕宿玄關道人治肴菽醪醺壯我顏偶一
話塵世近事了不嫻孤月流長空仙樂聞後山我欲從之
往彩雲不能攀遠近若可辨天風鳴珮環

響泉書屋

自註一名惜陰別墅順德陳穗田豐建

黃培芳

隱隱金銀臺雲中見新築何人彈指成響泉號書屋龍山

有詞客愛此理幽獨泉向屋底流雲來棟間宿當軒數點
山遶閣萬竿竹暮歸飯青精朝出逐麋鹿人生此福庭何
處更清福

開歲三日晚飯後與山人家蘭谷野步至松門深處

黃培芳

蒼官萬樹森排衙濛濛寒翠紛交加岩巖山徑一門入風
過掃影疑龍蛇清溪淺水出白石輕陰薄暝開桃花山人
飯飽但捫腹相與散步窮幽遐爆竹數聲動山谷桃符幾
處明山家野翁祀社方醉返青衫阜帽風中斜此間風物
亦人世惟留滄古無紛華陽迴大野萬物育春氣盎盎流
桑麻雲中雞犬自足樂何必勾漏營丹砂

志四

聖

遊浮山最深處至暗花溪橫雲谷

自註俗名
暗坑橫坑

黃培芳

雲端千尺松心逐飛鳥度轉轉四五峯高下屢迴互深窅
覲幽境石梁橫瀑布桃花開碧溪流鶯喚芳樹因樹架爲
門離披綠葉附世外有佳人求漿頗不忤小兒秀眉目見
客玉齒露門前憇瑤石靜極得真趣杳然非人間已失來
時路

白龍飲碧潭飛下千丈坂水花噴危石雲邊作蜺蜿雲去
衆山動雲歸萬壑晚但聞水泐泐不知山近遠行行遇樵
子暫出因買畚笑問客何來指點煙徑返

粵嶽觀日歌索諸君詩畫作

黃培芳

五龍潭水青濛濛，懶龍鞭起乘長風。騰身四百第一峯，坐
瞰日出扶桑紅。初出蒼涼逗一綫，隱隱霞氣升於東。漸起
芒角爭四溢，山川萬里光曠曠。太華懸知尙夜碧，粵嶽已
見撐青空。陰崖冷積千古雪，此際稍稍能消融。咸池下矚
甫罷浴，鯨波遠漾還磨銅。天門誅蕩對暘谷，金光直射迴
燭龍。鳳凰一聲振丹穴，自註山中
有鳳凰谷羽儀五色輝蒼穹。須臾
破曉天下白人間，始識歌梧桐。平生願得江山助，震岩耳
目開心胸。五遊洞天一觀日，瞬視富貴如秋蓬。飄飄九垓
忽歸去，神皋屢起方寸中。欲憑妙墨灑尺幅，點綴嶽色歸
天工。諸君肯發滄洲興，筆驅山海神先通。詩成畫畢試東
顧，突兀倒插千芙蓉。